

焦太史編輯國朝獻徵錄

焦太史編輯國朝獻徵錄卷之四十目錄

兵部三

侍郎

徐厘

胡昭

墨麟

盧淵

李衡

柴車

李黃

鄭辰

吳寧

李震

王偉

滕昭

俞欽

何琮

呂雯

張海

李介

楊謚

李貢

李昆

黃衷

王珙

陳洪謨

潘希曾

蔡天佑

寇天敘

鄭岳

胡守中

陶諧

潘珍

詹榮

目錄

焦太史編輯國朝獻徵錄卷之四十

兵部三

侍郎

兵部侍郎徐公垕傳

徐垕字宗實黃巖人負才抱氣有經時之志元末厭世不仕洪武初應薦入朝數被顧問敷對明切皆中時宜上喜將授憲職垕辭乃除銅陵簿請迎母就養忤旨謫役湘陰驛未幾選教駙馬能以師道自尊召見獎諭擢蘇州府通判奏發粟二十萬以活饑民奏漲病隄垕相度原隰大興築捍之役部使

者以爲妨農勞民屋言他役誠妨農水不退則田不可耕妨農孰甚焉且令有田者量募貧力饑人得哺正所謂佚道使民曷爲勞哉卒就其庸屬邑有樓貞婦奏乞旌表禮部謂前朝事不允屋言死生有間則比干之墓誰封禮官不能奪從之官終兵部侍郎

兵部侍郎胡公子昭神道碑

薛甲

明有大臣族不傳而人心有譜葬不具而公論有祠
行不同而考于義有合者曰蜀嘉州胡公子昭公之
沒去今百五十年嘉州去吾常之江陰亦八千有餘
里以予之顓蒙不學無所考信而能知有公者以有
公鄉人彭程二公之傳記與州誌故老之傳聞也故
曰不待族而譜革除年靖難師起公以兵部侍郎與
其師方公孝儒同死國事凡人道遂終之具與春秋
祭享之禮無一備者乃今龍山之陽有宮有額又有
祀田以供蒸嘗而公與其弟志遠女金奴血食一堂

輝映千古則今監察御史金公之爲而予以分憲茲
土贊成之也故曰不待葬而祠然公以社稷重臣海
內名士當我 文皇帝重清六合之時而不與解楊
諸人共致雍熙亦或有以從權之事望公者攷之聖
門則孟氏願學孔子孔子見南子不拒佛肸而孟子
不與右師言不以手援天下者公寔類之意聖賢有
定分公雖欲捨其所不可而學聖人之可有不可得
者此予所謂攷于義而合者也語曰聖達節賢守節
公之行守節之謂也公字仲常其爲人剛毅篤信初
名志高以榮學訓導見我 太祖高皇帝賜今名遷

官翰林當是時文學之士滿朝而公獨師事方公講
性命既赴市曹將就戮矣猶作詩諷朝貴從容不變
蹈刃如歸此其大節之中又有可聞者如此以予所
聞推所不聞知公他行多類此者而以時諱不傳爲
可惜也雖然有諸君之文有監察公之舉亦足以不
死矣公無墓道宜無所樹碑願妥侑于此則明靈出
入可以義起而予以職事承諸公之後亦當有詞銘
曰峨水東馳結爲滌川靈秀萃之是生大賢胡公之
生遭時遇主命名擢職簡自天子既得所事爰擇所
師侃侃方公講論不疑雲雷滿盈江河盪激公以一

華欲扶人極豈不自知力之不任大義莫逃以靖吾
心方公徇生公死亦繼玉映金輝千古增賁凌雲之
巖巍然有官邦人所築霜簡所封月映清江光生棟
宇公神來歸照我桑梓秋嘗春祀蘋藻馨香公偕第
女笑語同堂公名我知誰謂無譜公神我依誰謂無
主人心不泯公祠不亡有如不信視此銘章

兵部侍郎兼詹事府少詹事墨麟傳

麟陝西高陵人洪武二十五年以國子生擢監察御史尚嚴刻陞北平按察司副使上靖內難麟以守城功陞侍郎尋兼少詹事至是卒命工部給棺歸葬令有司治墳塋麟爲御史時有糧長罪不應刑麟燬煉成獄奏刑之然麟恒自歆於心及病恍惚見被縛者已而麟足趾皆腐脫盡乃死論者以爲冥報云

著之
爲世
減

兵部左侍郎盧淵傳

盧淵字文濺南昌新建人洪武中由太學生任兵部司馬部主事陞員外郎又陞郎中居官廉慎蒞事勤敏不苟從建文中陞左侍郎坐累黜上正大統召復其官淵與人交信爲人謀忠同僚如忠誠伯茹璫尚書劉鐫金忠方賓其人品不齊咸所心服而倚任焉嘗疽發背上遣內侍賜善藥疾愈入謝賚予尤厚永樂十四年十月卒賜祭及賻遣官護喪歸葬焉

兵部右侍郎李衡傳

李衡字秉鈞當塗人自少天性和柔然慷慨有立志登進士第選授翰林庶吉士使讀書于內秘由是學問益深除戶部四川司員外郎以廉介勤慎爲尚書夏原吉所任尋陞湖廣布政司叅政撫和邊夷得其力以給供應久之原吉薦衡爲侍郎方薦時衡爲人所奏徵詣都察院衡旣至京赴獄七日原吉復奏而出之尋拜兵部右侍郎數日卒于官衡爲人老成端重而有剴繁治劇之才學問疎暢古詩和平編麗有澹軒詩集藏于家子存由監生任江西星子縣學訓

導陞 王府教授致仕卒無僭石之儲時皆惜之其
詩文亦有可取者

兵部左侍郎錢塘柴公車墓誌銘

王直

公諱車字叔與姓柴氏世家錢塘大父允明父望皆以公貴贈嘉議大夫兵部右侍郎母嚴氏贈淑人公自少聰敏喜學遊郡庠從徐大章先生受春秋學成領鄉薦遂入太學諸生多推讓之永樂甲申擢爲兵部武選主事卽以勤慎得名未幾陞員外郎己丑太宗皇帝北征公與方尚書從行凡軍務倚辦於公公隨機應變無留事凡官屬從公者又能庇佑之衆皆樂從及還陞江西叅議時營造事嚴公入閩中取大材丁夫之貧病者公處之有方故能集事而民不

告勞初經廣信太守與公有舊餽蜜一罌公疑其重發視之皆白金笑曰此所謂故人知君君不知故人卒拒不納至閩縣有婦人抱嬰兒哭訴曰夫亡田產見奪於豪橫公察其實移文所司斷還之歲餘入爲職方郎中職方事最繁公治之有餘力會謠言當有變詔沿江諸郡擇賢守以公知岳州公鎮以靜民安之岳州有江湖之險官船來往當役民上下挽送多或至于百人暮夜促召不能集公私病之公計主客戶有丁幾何約三丁役一丁五十人領以總甲署其名小牌百人領以百長署之大牌視所役多寡用之

牌下皆來集無後者民得番休皆便之公事之暇則
至學宮與諸生講學或行田間視耕穫賞勤而戒惰
居三歲郡大治復召爲職方郎中丁內艱奪情俾任
事宣德庚戌陞兵部右侍郎公素有才望人後其進
命下皆爲喜轉左侍郎時殘虜假息塞下西鄙戒嚴
朝謀脣算使然而公等之功亦豈細也哉宜 聖天
子悼念之篤而恩禮之周也公之大節如此若其交
友敬臨財廉奉已有度待人有恩不附勢以干利其
美蓋不可勝書姑序次其大者使後世有考焉

兵部侍郎李蕢傳

李蕢字茂實長洲人永樂中進士釋褐除兵部武選司主事歷員外郎郎中在武選司二十年受知於尚書方賓陞太僕少卿靖遠伯王驥征麓川奏蕢爲佐俄丁父憂詔起復視事事竣陞工部侍郎始乞持服服闋以兵部尚書鄺埜薦改兵部侍郎卒於官蕢勤敏有吏材習知兵事所在著聲性沉厚不苟居鄉里未嘗以貴加人每出必步過里門上馬終其身如一日

兵部左侍郎鄭辰傳

鄭辰字文樞浙江西安縣人永樂中進士授監察御史江西福安民有告謀逆事辰往廉之得其誣狀抵以罪谷庶人有異謀遣辰陰察其虛實比還 太宗召至便殿親詢之辰語其不軌之狀甚悉尋擢山西按察使賜楮幣馳傳之任潞州盜起 朝廷欲遣兵往討辰謂此貧民懼徭役竄入山谷間者不宜加兵乃躬往撫諭遂皆安業召陞工部左侍郎奉勅考察雲南四川方面官還濬漕河有言宜自大名開渠通衛河以便行舟辰以勞民奏罷之正統中陞兵部左

侍郎兩歷九載以疾致仕正統九年五月卒命有司
營葬遣官賜祭

兵部右侍郎吳寧

吳寧字永清直隸欽縣人宣德庚戌進士授兵部主事進郎中正統己巳擢爲本部右侍郎北虜突入紫荆關侵掠遣寧北出德勝門會總兵官議方略及還門閉弗啓虜騎充斥于途從者各驚散寧獨立雨中區畫衛兵及四來避寇男婦移時乃入因憂勞成疾景泰元年遂上疏乞歸家居三十餘年成化十八年十一月卒年八十有四訃聞賜祭葬如例寧爲人方介自守不事表擢安于恬退晚年優游田里爲鄉邦所重云

兵部左侍郎李公震神道碑銘

商輅

公姓李氏諱震字用初別號省庵先世山西臨汾人
元季曾伯祖希賢遊宦于燕因家宛平曾祖希魯贈
禮部左侍郎祖嘉永樂中累官禮部左侍郎父栗以
公貴累贈兵部右侍郎妣王氏累贈淑人公天資穎
敏自幼嗜學以蔭補太學生領宣德乙卯鄉薦正統
改元登進士改庶吉士讀中秘書肆力問學詞林諸
公深器重之辛酉擢工科給事中職務修舉嘗持節
往河南親藩行冊封禮餽遺一無所受癸亥陞
右給事中戊辰丁艱喪葬祭一遵家禮己巳冬虜寇

犯順京師戒嚴奪情起公守東直門景泰改元勅進
階徵仕郎以已官贈其父母贈孺人辛未陞通政使
司左叅議適南京通政缺遂改蒞焉戊寅陞南京兵
部右侍郎成化丙戌 召改兵部踰年陞左侍郎進
階勲正議大夫資治尹食正二品俸辛卯奉 勅巡
視紫荆關一帶山場置立界牌禁養林木衛護關隘
防禦賊寇還奏稱 旨壬辰清理武官貼黃甲午忽
遘瘡疾竟弗起公賦性醇厚才識高邁居家孝友蒞
官勤慎任兩京所至除弊興利政聲籍籍尤厚於故
舊冬官孟侍郎初任南京住部堂後廡忽得疾卒同

官諱之移斂廬外公往弔嘆曰孟公生爲卿佐死可
妻於此乎立命舁還舊寢宛平陳定與公祖爲友及
歿其弟安留金陵年老家貧且食指衆弗克返故里
公至卽爲助舟車歸之其急於爲義類此

兵部右侍郎王偉傳

兵部右侍郎王偉字士英湖廣攸縣人隨父伯靈隨
戍宣府年十四宣廟北巡獻安邊頌命補保安州學
生舉正統丙辰進士改翰林院庶吉士授戶部主事
甚有時譽正統己巳北虜犯順命偉行監察御史事
糾集民壯守廣平遷兵部職方郎中時邊圉多事文
移填委偉援筆立就皆中機會少保于謙專任之引
使佐已擢兵部右侍郎命出視邊常密具方略以上
虜有小田兒者本中國人降虜爲邊患偉受謙密計
至陽和城見其隨虜人貢行差後伏勇士于道執而

斬之紿虜曰彼思其親亡去矣自是邊患稍息天順
初偉爲右亨所構免官歸成化三年復召爲兵部右
侍郎初亨構于謙等黨逆鏤板榜示天下至是偉以
爲言乃并毀之五年以病乞歸命還家養疾疾已復
來道濟寧卒

兵部左侍郎滕公昭傳

朱睦㮮

滕昭字自明黃州知府霄之子也正統六年以鄉舉授監察御史巡按順天福建俱有聲績天順初擢左僉都御史佐理院事踰年以憂去純皇嗣位詔起復巡撫遼東昭謹斥堠嚴訓練備芻粟明賞罰凡數年虜不敢近塞昭乃上疏言大明律乃一代定法而決斷武臣獨舍律用例以是武臣益貪縱不檢請一切以律從事不報成化二年進右副都御史總督漕運兼巡撫淮揚昭奏建吳二庶人宜移本城舊中書省居之或安置有城池軍衛之所稍便出入亦聖王

分
化

分
化

罪人不孥之意也疏下禮部議不可遂止五年 召

還復遣巡視福建上杭有紫雲臺者鄧茂七之黨嘗

據爲亂昭乃相其要害請立歸化縣治未還改視蘇

松而馬馱沙最繁盛寄治江陰民苦往返昭復請分

置靖江縣 上俱報可七年拜兵部右侍郎復轉左

侍郎時汪直管西廠刺事僭橫日熾中外累足而立

於是兵部尚書項忠倡義草疏約九卿會劾詔罷西

廠而御史戴縉久不得調乃言直所行皆公直不宜

革罷於是 上復命直管西廠縉遂進用直既司廠

事首發忠過廷鞫遂坐賊罷去昭以忠故亦致仕年

五十九卒於家 論曰初汪直竊政時附離者不少而滕公贊項公劾直罷西廠豈見義不爲無勇者耶及直以薦復用二公卒蒙構陷自是九卿以下相繼被黜者百數人於戲自古閹豎之禍未有無黨助以成者戴縉之罪可勝誅哉

兵部左侍郎俞欽傳

俞欽字振恭浙江新昌縣人景泰辛未進士選爲翰林院庶吉士授禮部儀制司主事天順初陞郎中癸未會試場火左遷松江府同知成化改元召遷改兵部武選郎中乙酉征山都掌蠻寇有功陞太常寺少卿壬辰陞禮部右侍郎丁外艱起復爲兵部左侍郎制終始就任九載秩滿加正二品俸成化二十年八月卒于官年五十四計聞賜祭葬如例欽通敏有才幹處事善思慮而不失正所歷皆號稱職蓋能臣也時將以重任畀之而欽忽報卒聞者多爲憫惜云

兵部左侍郎何琮傳

何琮字文璧浙江仁和县人景泰五年進士選爲翰林庶吉士預修寰宇通志授禮科給事中每對仗彈劾旨吐清亮英廟皇帝特注意焉滿刺加國請封琮當出使所司以名聞上顧左右曰茲面黃白善矣事者耶曷爲遣之卽內批改他給事中一日六科讀彈文罷上曰今日彈文胡不令何琮讀其眷注如此擢通政司右叅議成化中轉左叅議進左通政及掌司事承規矩廢弛之舊蒞之以嚴宿弊頗革遷兵部右侍郎適署部印遇事亦詳愼未幾轉左侍郎

當遷以兩京無缺員特加正二品俸踰月卒時弘治
二年十月賜祭葬如例琮性詳雅居官無貶譽

兵部左侍郎呂雯傳

兵部左侍郎呂雯字天章直隸安州人舉鄉試選授
陝西道監察御史時東夷弗靖左都御史李秉出師
雯奉旨紀功還擢南京通政司右叅議丁內艱服闋
改南京光祿寺少卿出納有度以事簡故名益彰未
幾陞太僕少卿不避勞劇馬政克舉以薦擢都察院
右僉都御史巡撫延綏有防禦功尋擢兵部右侍郎
遷左侍郎練達邊務弘治七年五月卒計開賜祭葬
如例雯性夷曠不爲矯激遇事善裁決待物多從厚
博涉羣藝論象緯有驗祿命亦多奇中云

通議大夫兵部左侍郎德州張公海墓誌銘

吳寬

山西右叅政前兵部左侍郎張公以疾乞致仕凡再上疏詞益懇切始得旨將行竟卒于官舍實弘治戊午二月十六日也享年六十三初公在兵部會上魯番侵擾哈密累歲未已朝議謂哈密爲通西域要路自文皇帝時王其酋長給以金印俾屏蔽一方今微弱不振宜得文武大臣有才望者往治其事時公方佐兵部上乃命公錫之璽書所以責成之者甚切公至謂比來夷狄肆侮邊將不能備禦此威令不

行所致也始奏調分守副帥一人罪鎮守以下官三人爲誤事者之戒且謂御戎之道當先固我疆場如永昌鎮夷比近甘肅今永昌旣被殺掠而鎮夷人戶牛羊茁壯虜尤垂涎兩路孤懸實難防守宜擇有謀勇者二人各率游兵二千互相策應內旣無虞徐圖其外則番族小醜不足治也旣乃詢謀羣策籌畫計慮旦暮不遺久之乃合衆議條上六事一定酋帥謂哈密寄居邊城歲久供費不貲殊非長策今其地殘破旁有苦峪城合給與耕具種糧遣回居住特設酋帥一人副帥三人各給冠帶以統攝之二除亂本謂

哈密既弱下人數叛其主投順土番願爲鄉導至殺
虜其主占據其地今其人家族寄居于此必來省視
或充貢使而入密識其人卽擒捕之以正其罪三訪
夷情土番西距哈密七百里譯知其國城堡傾頽兵
馬稀鮮特恃險遠有急則易於北走耳當先用間謀
以離壞其黨然後出其不意以掩擊之四遏亂略土
番累受 朝廷金緡之賜其志益驕今所賜物宜追
還之仍閉關卻絕勿與交通且拘其貢使特縱其一
二歸語其主俾自審去就彼既計窮必來款塞再議
處之五固封守肅州臨邊設鎮以來臺堡相接僅爲

守望之計雖有嘉峪一關卑隘不稱宜加修築務極堅完更展城垣建樓櫓以爲貢道偉觀六預調度夫虜騎犯邊每以冬月宜以其時於緣邊要地預屯重兵若干以便應援又須預練游兵若干以俟調用仍儲芻粟若干可給五年之需則庶乎有備而外患可免也事下兵部集議于朝尚書馬公以公籌畫深遠計慮精詳非苟簡於一時者比輒覆奏行之於是土番始相畏服而哈密漸得以自立矣乃復修土功以廣戍守飾兵器以便戰伐皆爲經久之計西方旣無事公乃還朝將陛見或謂宜疏經略事目以上公曰

吾昔已具奏矣已而言官劾公不俟召而還者遂落
職有山西之命衆以公久勞于外今不發一矢坐制
黠虜之亂當蒙顯擢顧以微青去意公不平而公卽
已赴任矣至則益事事不懈蓋踰年遂致仕及卒人
尤惜之公諱海字文淵姓張氏少遊鄉學爲弟子性
敏而勤才名特著天順己卯山東鄉試第一人成化
丙戌登進士第授戶科給事中進左給事中再進都
給事中遂推順天府丞再擢太僕寺卿丁內艱服除
適吏部尚書尹公以怨謗去位一時鄉人皆遭貶斥
公得雲南鶴慶府知府弘治戊申 今上嗣位召還

爲順天府尹明年拜兵部右侍郎已乃降授叅政平生履歷如此公素剛直居諫垣一時同官建言章疏多出公手數因災陳時政得失劾兩京大臣之不職者爲府丞時一中要方用事勢張甚尹以公事偕公往見先屈膝公獨立庭下人爲公危而公自如及爲尹公事填委裁決無滯性更廉潔位旣通顯猶僦屋而居喜文事發於論議燁然可觀也張世爲濟南德州人公之祖忠父鵬舉俱以公貴贈通議大夫兵部右侍郎

通議大夫兵部左侍郎兼都察院左僉都御史

贈兵部尚書貞菴李公介墓表 劉 健

公諱介字守正號貞菴世爲東萊高密人自元時爲巨族至諱遜者舉人材爲福建布政司理問轉陝西都司經歷至諱傑者中京闡鄉試授睢州學正陞鎮海太倉學教授學者稱爲松菴先生公之大父父也以公貴俱贈通議大夫兵部左侍郎母栗氏封太淑人公生而聰警自幼爲嬉戲卽異常兒十歲解屬文成化乙酉舉山東鄉薦已丑登進士入翰林爲庶吉士時文和劉公爲學士職教誨深所器重再餘年授

四川道監察御史未幾丁松菴憂守制服闋除河南
道奉勅巡視兩浙鹽法搜剔宿弊甚爲浙人所稱事
竣還掌道事司考覈以公道稱久之受知都憲王公
世昌俾總合院章奏遇事可言每率同列論奏被廷
謫者再輿論尤多焉壬寅九載滿遷大理寺丞丁未
轉右少卿 今上皇帝初踐祚簡命代祀東方山川
還轉左少卿不數月宣府巡撫官缺員吏部以公名
聞特命改都察院左僉都御史往蒞之至則閱士馬
利器械完城堡計糧餉凡所以圖安制勝舉無遺策
於是境內肅然僅九閱月召還本院視事公感知道

慨然以綱紀自任與論益重之弘治庚戌僉都滿載例受誥止及本身公上疏請移封父母無何太淑人以疾卒公哀毀踰禮解官歸守制上特詔存其缺以待蓋殊眷也癸丑服除仍舊職又明年轉左侍郎凡軍國重務殫心佐理恒若不及雅爲大司馬馬公所重丁巳夏北虜謀衆寇邊羽檄數至朝廷將出兵禦之臺諫建議宣府大同邊備久弛宜簡命大臣先經理于是僉以公舉上特允之仍命兼左僉都御史以往甫至宣府虜騎果犯洗馬陵等處公卽分遣將士授以方略俾四道并出威聲大振虜遂遁

去先是二邊軍士有力者率以賄買閑及役占於私門至不識弓矢大同尤甚公力爲檢閱得萬二千人並所召募萬五千人別爲行伍訓練之以備征戰大同舊有官田萬餘頃聽軍民耕種而納其租直於官謂之牛犊錢近率爲勢要所兼併而邊軍顧以追陪馬價被笞掠公甚憤之按出其田遂得銀數千兩以資馬價軍士遂追追併之苦沿邊城堡百里外雖守將恒所不至公悉親身閱視其要害以爲籌畫條陳便宜二十餘事詔皆議行之歲且盡公以邊事就緒兼過勞致疾方奏請還朝疾忽大作竟卒于宣府之

公寓戊午正月二日也距其生正統乙丑享年五十
有四計聞上嗟悼久之特贈本部尚書遣官諭祭
命有司爲營葬事

兵部右侍郎楊謚傳

楊謚字文寧河南儀封縣人成化五年進士授直隸崑山知縣以治行卓異擢浙江道監察御史本院以謚練習憲體委掌諸道章奏九年秩滿陞太僕寺少卿未幾轉大理寺右少卿復進都察院右僉都御史奉勅巡撫宣府會工部缺侍郎廷臣以謚請而諸御史奏留之不果遷左副都御史尋遷兵部右侍郎以疾乞休不允時北虜寇邊命謚還京營軍馬竟以疾卒時弘治十三年六月賜祭葬如例謚爲人端慎平易臨事未嘗近名而名亦隨之嘗監臨湖廣鄉試就

稱得人繼巡按浙江尤爲士大夫所重宣府屯田多
爲勢豪吞占謹悉以法清出之得地千餘頃撥軍佃
種歲收米穀萬斛嘗署掌院事憲度肅然及爲侍郎
每悉心贊佐不激不隨甚爲上論所推重云

兵部右侍郎李貢

兵部右侍郎李貢字惟正直隸蕪湖縣人成化甲辰進士授戶部主事陞員外郎改刑部陞郎中山東按察司副使福建按察使陝西右布政使山西左布政使都察院右副都御史巡撫遼東以事忤劉瑾罰米勒致仕瑾誅復召用整飭薊州等處邊備兼巡撫順天等府陞兵部右侍郎年未及力求致仕未抵任而去正德十一年卒賜祭葬如例貢勤慎精敏歷官所至稱治在山西令郡邑置民膏簿出入有稽費節民裕撫順天增修通州城築古北口壘京輔有備與兄

浙江左布政贊同舉進士並有時譽而貢爲優云

嘉議大夫兵部左侍郎東崗李公昆碑銘

毛紀

公諱昆字承裕東崗其別號世爲萊之高密人曾祖
遷陝西行都司經歷贈通議大夫兵部左侍郎祖傑
中京閭鄉試歷官太倉衛學教授贈如曾祖皆以貞
菴貴也父介貞菴登進士累官兵部左侍郎兼都察
院左僉都御史氣節名業爲一時重卒贈兵部尚書
母杜氏封淑人公世傳禮嗜學博覽甫弱冠登進士
弘治庚戌授刑部廣西司主事嘗條具數事呈部以
行勒石廳壁遭淑人喪制終除禮部儀制司適孝廟

以內官何鼎事怒諸言者公抗疏論言官不得其言
況他官乎方下求言之詔而猶進言之難況平日乎
萬一事有闕于宗社誰敢冒危而極言之上爲之震
威戊午遭貞菴公喪癸亥復除兵部武庫司時有旨
建延壽塔於朝陽門外公奏乞罷無益興作移其費
以恤貧民言甚剴切虜酋小王子上書欲以六千人
入貢詞涉悖慢廷議紛紛莫定公謂宜返其書勅邊
臣諭令休曲輸誠然後議其入貢人數本兵東山劉
公主其說而行之正德初羣小用事公奏宜屏黜邪
枉進用忠直杜宦戚請乞之私節中外侈靡之費事

皆以先皇爲法留中不報未幾升本司員外郎轉郎
中一日吏檢庫中年久文卷獲一匣若貯金者漫無
可稽吏密以白公笑而不答乃會衆啓視之有金四
百餘兩卽移付公帑丁卯調武庫司剗革宿弊謂託
不行觸逆瑾怒謫知解州事關民瘼而掣肘於土者
必委曲調劑行而後已解民至今懷之已巳陞陝西
按察司僉事分巡關南道兼管兵備值巨盜鄆藍等
剽掠蜀漢間大肆猖獗公調度有方將士効力賊望
風輒北辛未奉勅督理學政關中士子咸服之尋遷
本司副使癸酉陞湖廣按察使右善鋤強風紀丕振

明年陞本省右布政使稽除戎籍通絕之戶不復爲
重保累湖民咸受其賜乙亥轉陝西左布政使公以
錢穀弊滋乃多置簿鈐以印下及經手胥役各執其
一凡出納錢穀之數備記之月再查照人莫獲容其
奸甫四閱月擢都察院右副都御史巡撫甘肅公甄
材勇計備時練士馬明斥埃務遠圖而不急近功番
賊邦卜等出沒莊浪岔口等處遮絕西域入貢之路
公遣兵抵巢穴斬首惡二十獲所奪方物千餘事捷
聞賜勅獎厲公雅知兵略於武侯人韓國尤得其肯
綮因言古人之學博大淵洽隨應而變如此偶視都

司獄牆隈白骨堆積詢之乃遠年罪人死者公慶然
曰死已償其罪矣遺骸暴露何耶遂於城外作義塚
埋之肅地邊夷昏多論財軍貧未娶者公查各衛得
千餘人量給銀布助之後公還送者攜妻孥仗道而
泣皆昔之獲配者丁丑引疾乞休優詔褒答不允權
倖錢寧以私中傷逮詔獄左遷浙江按察司副使辛
巳今上登極篤念舊臣復命整飭薊州等處邊備
兼巡撫順天地方威惠兼濟持正不撓畿輔賴之明
年召入爲兵部右侍郎凡寧邊置將重務協贊良多
甲申大同鎮軍弗靖命公撫定賜金幣寶鑑至鎮宣

布 朝廷德威示以禍福且計處周悉衆遂帖然還
朝因以地方事宜奏上行之無何轉左侍郎咸謂公
位秩踵父後不多見也是冬忽感疾不仁累疏乞休
溫旨慰留乙酉夏復以養疾請乃荷俞旨給驛以歸
命有司俟疾愈奏聞起用實殊眷云公旣歸時與一
二嫻舊共坐飲少而樂談咏終夕不倦有司來問者
傳謝而已時方冀其復用而竟以夙恙遽已焉悲夫
公事二親奉先祀克盡誠敬一千禮不少苟教子弟
業儒務農恒以綺紈之習爲戒待族黨睦以和遇貧
乏或顛危者不吝賑拔與鄉人處若無位者而人益

親焉然居官剛方明果人罔敢干以私而廉靜之操
至老弗渝其視勢與利則謹避之曰升沉得喪命也
安可強邪用是屢嬰困抑不少芥蒂于中第若平日
然蓋公天賦既高蚤承家學力益精以邃故德器所
就渾厚從容出處大節光峻靡瑕有人之所不可及
者爲文平淡中有理趣不喜作艱澁語詩尤工於五
言得意處有唐人風致染翰端勁貞菴公勅葬碑刻
皆其手書所著有東岡小稿數卷藏于家

兵部右侍郎黃公衷傳

黃佐

黃衷字子和南海人父璉居喪盡禮以學行稱譽髦多從之遊衷幼穎絕倫三歲誦孝經問孝本天性也何別於天子諸侯璉大異之弱冠登進士第授南京戶部主事監江北諸倉查括積歲侵羨得粟十餘萬及督榷揚州尋罹內艱僅四十日輸榷銀九千三百餘兩前此卽一歲之入也正德初復除戶部晉員外郎罹外艱奔喪服闋銓衡擬改御史力辭乃補南京兵部員外郎晉禮部郎中後轉武選尋遷吏部在留都久與朱應登顧璘陳沂輩以詩文擅名後知湖州

府稍遷福建都轉運使監司胡世寧薦衷堪總樞政
遂晉廣西叅政督糧至則嚴繩恣爲奸利者境內肅
然大征古田帥師由洛容斬首二千餘級論功晉俸
一階兼賜銀幣辛巳八月晉雲南右布政使征芒市
以功癸未轉左巡察疏衷忠清公亮宜加重任甲申
擢右副都御史巡撫雲南薦賢黜貪安民禦盜清里
役以節財力復條陳地方利病八事皆切機宜無何
移鎮湖廣兼理戎務首劾分巡守備者二人奸吏多
望風解去復修沔陽州龍淵倉等隄士民立碑以
紀功德在鎮數月積粟八十餘萬石銀四萬餘兩戶

部疏聞降勅嘉獎賚以金帛丙戌湖北盜起委守巡
官授以方略進兵剿獲首惡六人斬首二百四十餘
級生擒六百九十餘人捷聞大被褒賚會營仁壽宮
及顯陵晉工部右侍郎兼僉都御史督理運木事
竣有銀幣之賜以考最方病足痿乞休不允比改兵
部右侍郎得報卽抵家疏四上皆不許辭會有忌之
者恣爲飛語謂衷潛至京師乘山轎謁當路人皆知
爲致仕侍郎王蓋非衷也後校尉奉旨密查白廣
至京驛遞關文雖偵伺無跡猶勒冠帶閑住或勸上
疏自明衷曰事久當白何必辯也巳而言官奏根究

諸人竟亦報罷久之奉 詔復職致仕卒年八十所
著有矩洲文集十卷詩集十卷奏議十卷海語一卷
皆行於世

兵部右侍郎王珣傳

永平志

王珣字汝溫永平衛人弘治己未進士選兵科給事中督工 泰陵中使董役者剝削軍士伐近 陵山水代薪以規利劾之伏辜故工易完且美糜費之省爲多賜銀幣陞工科左徽州有豪族爭訟數年不決命勘遂得情獄成改御史覈應天諸郡公藏知府某不職懼得罪密通賄卽發其賊私罷歸事傳京師滕太史爲作却金傳陞刑科都給事中 武廟鋪宮奏省費數千金以濟邊餉陞順天府丞歲荒餓莩載途竭力賑活甚衆陞都察院左僉都御史提督鴈門諸

關兼巡撫山西。裁宗室驕橫以權要規鹽利者。峻拒之。關境肅然。會虜分路入寇。督兵于寧武關。戰禦將官以逗遛失利。劾其罪。械繫京師。因自劾。並三邊撫臣俱左遷。尋授浙江左叅議。豪民有匿租數十載。躬履畝得數百頃。爲公稅。孝豐有作亂者。遠近騷然。衆議調兵勦之。請先往。至卽解散。陞河南右叅政。分守南陽。捕浙川礦賊。乃別脅從若干。值盛寒。多凍餒死。悉活以粥。遣之。賜銀幣。陞左僉都御史。巡撫山東。擇有司布各郡。審編戶。則以均徭役。王師討逆濠。道經齊魯。籌芻糧。供億兵。皆無敢犯者。及六飛南幸。有司

預集夫役數萬候境上疫作且乏食第令及期無誤
悉令散歸活者不可勝計鎮守指以供御大肆科索
屢戒不聽卽正色責之欲擊以笏乃止陞右副都御
史巡撫陝西遇上尊號推恩贈祖福山及考信如制
秦中宗室尤衍祿每不給爲有司累令多方務積折
補其數上下稱便河湟黠虜欲南下牧馬督固原將
士嚴兵禦之遂遁歸略無所失邊民安堵陞南京大
理寺卿擢兵部右侍郎卒賜祭葬于邵城東蓮花源
之原子長道平庵國子生

兵部左侍郎高吾陳先生洪謨行狀 蔣信

公諱洪謨字宗禹高吾其別號世居武陵之東村祖
鋪由胃監授海寧經歷父良領成化庚子鄉薦終京
學司訓俱贈通議大夫兵部右侍郎母王氏初封安
人後封淑人謚先生實成化甲午八月初九日先生
生體貌異常頭骨間有肉角半寸許足心有赤誌如
豆穎敏尤凝重寡言笑惟喜親書史二十二領弘治
乙卯鄉薦明年第進士授刑部主事轉員外郎訊鞠
多平反以明練有執爲大司寇屠公白公所重丁外
艱服闋赴京時正德己巳巨猾劉瑾專擅乃以母老
獻徵錄

乞便養改南京戶部員外郎遷正郎奉差催督蘇杭等處逋負錢糧劑量有法公私賴之擢守漳虛心訪旬日卽得其蠹民老吏一二人置諸法人大驚服庚午癸酉鄉試俱有事簾外榜中得人郡有巨寇林廣周負海嘯聚數千人屬邑歲苦爲患公至設策盡平之郡學有泮池渠通潮汐湮廢百餘年公濬之潮至池中科甲遂稱盛學樂器久壞遣人求泗磬請神樂觀知音樂羽士選俊民百餘人肄習仍刻大成樂譜傳焉適琉球使者過漳聞而來觀皆合掌捧手稱嘆而去一日習儀開元寺見寺後有文公朱先生祠

已敝壞祠後有峰僧廬其下仍舊額扁爲芝山書院
乃事文公以陳北溪黃勉齋蔡九峰爲配又遴選庠
生數十人讀書其中士習丕變郡父老相傳文公嘗
遺一聯云十二峰送青排闥自天寶以飛來五百年
逃墨歸儒跨開元之頂上蓋若有待云守漳之三年
有畬人居海濱者見有大鳥飛過遺一尾於水邊長
七八尺五采炫煥衆以爲鳳尾拾以來獻翁命寘之
庫中略不爲異後鎮守太監遣人來取答以久焚之
時服公雅量郡志自文公纂修之後垂數百年未有
繼者公修之郡文獻始大備俗尚浮屠鼎訟乃取呂

氏鄉約諭民行之朔望親臨約所又濟龍溪陂灌田
萬頃漳人至今名爲陳公陂甲戌考察赴吏部以應
朝二司俱以陞遷未至公得上堂陳所屬賢否上司
原注廉勤實不然者一一舉其實跡不看揭帖應答
如響太宰達菴楊公都憲葉城石公大加稱賞卽命
文選司查缺推陞江西叅政漳人懷其德乃卽鄉約
所建祠塑公像事之江西適宸濠有異志寅僚多畏
禍自營巡撫孫公燧知公特倚重會擢貴州按察使
隨丁內艱已卯吏部扣滿起雲南按察使已有十八
案夷民之亂計必得公事乃可濟巡撫何公孟春間

來甚喜相與定謀遂空其地捷聞有文幣白金之賜
又條列二十餘事通行按屬軍衛有司土流衙門遵
行人知懾服時鎮守太監史泰金騰分守太監劉玉
貪虐無厭託進貢爲名搜取金寶不勝其擾公禁所
司勿得奉行又泰玉嚇取富軍金銀等物遠近含冤
公得其下用事叅隨等罪之又泰家人捶生員於途
訴於公公以大義諷泰泰不得已付公正法公又上
疏極言泰王之惡後俱勒回一省賴以安黔國公沐
紹勲未襲爵其叔叅將崧賂權貴謀得之事下勘覆
公首抗議紹勲年已長成奪之非祖宗法不可由是

衆議翕然嘉靖壬午陞山東左布政黔國公以珍異
贈公爲報堅却之止受鶚墪松子而已行日有百歲
父老自尋甸山中送至金馬關者數人公謝遣之過
武陵以在滇遇勞疾作乃計乞休上疏吏部難之處
缺以俟會山東撫按交章促公赴任公辭益力吏部
乃請破外官養病例以處公荷溫旨有才識可用竊
嗟起用之語時夏江漲決堤大冰淹沒城東北鄉尤
甚祖居實當其衝慮族人有受害者亟買二舟各載
湯粥薪米之類遣人分給族人果依棲屋脊及樹上
饑寒者二日矣家人乃以一舟濟之又以一舟分給

鄰右次日水退賴得無恙癸未九月吏部復起公補
江西左布政公不敢辭遂往蒞任時兵燹之後人民
艱窘府庫空虛公爲百計節縮凡逋欠請於撫按蠲
之前十月陞都御史奉 聖書巡撫其地公感激裁
冗費飭軍旅察奸貪除宿蠹夙夜忘疲已乃請建縣
治立儒學重修白鹿洞聘致仕提學副使高公賁亨
主洞事以風俊彥謂先朝處士吳與弼宜得表章乃
上疏請制額祭典遂荷旨賜祠額曰崇儒以至不屈
死事知府宋以方節婦伍氏皆賴表揚於時少宗伯
楊公廉卒於家則疏其賢請恤典加恩焉又積穀至
數萬石

百萬石亦荷金幣之賜丁亥以太監吳猷爲襄真人
修龍虎觀破冒太濫爲公所抑訴於朝乃放歸家居
二年科道暨巡撫暨總督論薦凡七已丑陞兵部右
侍郎隨提督閩營清理軍職貼黃進左侍郎以秩滿
荷恩進階及推封三代并得賜大學衍義大明會典
諸書及織金文綺諸寶鈔賜之時大司馬則嘉魚李
公承勲李公卒朝議方歸公偶值部災罷歸則首相
張以宿恨中之也時年五十有八乃掃高吾精舍居
之課子弟接引里中俊秀近數十年乙卯八十有二
卒

大司馬竹澗潘公希曾傳

程文德

公諱希曾字仲魯浙之金華人也其先畢公高子季孫者食采于潘子孫因以爲氏國朝洪武間有彥亨者以賢良徵至朝堂問治道仍奉使江右未拜官卒彥亨生文華贈文林郎山東道監察御史文華生洪爲御史論列無所避陞廣西按察司僉事累贈中順大夫南京太僕寺卿洪生璋卽公父也登成化壬辰進士歷官陝西按察司提學副使祖母吳氏母姜氏累贈淑人公兄弟三人長希爽散官次希顏汝王教授公最少穎異七年能詩文十有四年喪憲副公

子陝奉淑人以喪歸讀禮如成人弱冠補郡第一員
慨然慕鄉先哲何王金許四君子之傳砥行明經迺
出流輩弘治辛酉舉于鄉明年壬戌登進士尋被選
翰林庶吉士秋迎淑人就養京邸未幾淑人以疾終
公扶柩還葬除服授兵科給事中時閹監初熾公灼
見其幾有汪鉦者故太監汪直義男也乞陞錦衣衛
鎮撫帶俸守塋公卽疏奪之其略曰世祿以及子孫
鬼神不歆非類內官本無後而強求世祿之恩義男
本異姓而欲冒他鬼之蔭物理人情甚是无謂疏上
中官切齒而公之禍基矣復因災異陳言勸上隆

大孝勤 聖學節遊樂遠佞倖振因循懲玩法備虜
寇勵士節八事其略曰事天之道不外於事親得親
之心斯可以得天伏望 陛下勤詣 靈几躬禮
宗廟近思 先帝教育之恩遠念 祖宗累積之德
又時朝于 兩宮曲盡母子之情樂聞訓誥之益乃
所以隆大孝也至於講學一事尤帝皇圖治之本從
容便殿之中講論片時之會與視朝御膳等爾於
聖體未勞也顧乃專事游樂不避炎日 陛下柰何
舍有益而不爲作無益而不憚勞耶伏望仍開經筵
日講使日新之功有加無已乃所以勤聖學也如射

獵遊戲往往使人心意荒惑形神勞頓千金之子坐
不垂堂陛下以宗廟社稷之身豈不自愛哉此
皆由左右前後不得正人希寵導非迷君誤國伏
望放鷹犬絕玩戲仍簡內臣端謹者以充侍從務俾
游樂有節而佞倖不得近天下之患莫甚於因循因
循不振則國政日弊近該部奏准查革冗食濫費足
國裕民莫急於此而乃累旬浹月不卽奉行部寺猶
然諸司何責京師如此藩郡可知伏乞降旨切責斷
在必行庶幾人心知警而因循可振也朝廷之患莫
大於玩法玩法不懲則主權下移近該部奏准查看

草場以補國用太監甯瑾乃敢無故奏沮此其徇私罔上情罪顯然乞特敕法司究治庶幾威權不失而玩法可懲也方今北虜窺視南夷竊發蘇松近地海寇嘯聚江西四川時各有警夫用力攻戰固在將官而運籌調度多在憲職往時巡撫起自陞用者率與邊境及其頗積年勞漸轉內地此但爲人擇官非爲地方任人也今宜察其不堪邊寄者取回別用果有文武長才者特加久任秩滿則加其官有功則錄其嗣債事則治其罪如此而虜寇不靖臣弗信也臣又聞國家必養廉恥之士而後能得忠義之臣律例文

武官犯公罪並許收贖守衛上直軍校犯笞杖罪俱
令納鈔婦人應決杖者非姦罪不去衣此我祖宗
仁至義盡也且廷臣密邇不啻軍校賢者守身不異
貞女小有過犯多受刑辱臣竊傷之乞勅法司鎮撫
凡常朝官員過犯非係賊惡無得去衣加辱庶幾全
君臣之大體興禮教於無窮其於國家非小補也他
疏語皆剴切不便近倖由是逆瑾遂謀中傷正德丁
卯差湖貴二省計處邊儲陞吏科右給事中時瑾虐
嬖方熾凡差者必重賂斬免禍有司亦爲公備千金
公毅然却之曰我爲諫官不能爲朝廷除惡我之罪

也柰何復助之乎瑾又風公多叅劾爲賄地公復不
從瑾大怒矯命械公下 詔獄考訊欲寘之死旣復
杖于 闕下奄然而暈瑾快曰死矣左右負以出久
乃甦當時見瑾者雖公卿必屈卽被謫譴亦必辭以
行公旣除籍爲民獨不往還鄉里杜門不出日惟課
子弟讀書宅後池旁佳竹蔭可息間招親友觴咏悠
然自得因自號竹澗居士時蘭谿章楓山先生憇於
人少許可獨稱公清修苦節且貽書曰世上何人號
最閒司諫拂衣歸華山執事此歸賢於二十四考中
書矣庚午瑾伏誅明年 詔起公刑科右給事中壬

中偕編脩湛公若水奉使安南錫麟袍玉帶服以行
尋陞禮科左給事中入國先諭威德正禮儀然後致
命返三辭其贐皆作詩諭意足以服裔夷章 王震
非徒不辱而已紀事觀風有南封錄焉反 命陞工
科都給事中時方營建乾清坤寧二宮內官復請修
蓋太素殿天鵞房船塢諸役費累鉅萬公抗疏爭之
其略曰天下之財力有限二宮之營建方興寬一分
則得一分之濟早一日則享一日之安況邊陲之軍
儲告匱內外之冗食益繁山東河南近經兵燹江西
四川未復瘡痍大木採及於遠方工料派遍於天下

若復別興土木誠恐民不堪命且古昔帝王非無臺池以供遊觀然其作有時其遊有節故民樂其樂天眷其德考之月令當夏毋起土功毋發大衆今時旣不宜矣況大內遊玩之處頻年營建不少必欲繼作尤非樽節之道疏上不報丙子遷南京太僕寺少卿先是滁和之民困於納馬公爲奏更折色民大稱便而馬課視昔易完每遇災沴復請蠲貸長淮南北之人咸德焉丁丑環滁大雪時聞鑒輿北幸乃作感雪賦在滁六年不調今上御極擢本寺卿嘉靖癸未遷南京太常寺卿期月改北提督四夷館時大禮

未定議者紛紛公慮其聚訟而貽患也作大禮問以解之公言出而羣議遂定時議禮當上意輒得下次擢公嫌希附卒不以聞主議者求觀亦弗予上計已決期日下詔上寶冊宰臣猶執舊議上甚怒禍且不測公往與言遂草詔大禮卒以定而臣工陰受其福公有調和之力焉乙酉晉都察院右副都御史提督南贛汀漳等處軍務賜璽書斧鉞至則明號令修器械時簡教廉謀勇信賞罰先是壬癸之亂招撫新民或詐殺之由是各巢往往復連比爲患公鑒斯弊務馭以誠信惟自相告訐者聽之以離其黨

舊有功未賞者有司或吝出納公謂此何以勸且示
之不信悉賞之於是惠州黥寇賴貴聚衆肆虐公發
兵洗其巢穴凱奏 上嘉悅賜金幣慰勞溯頭餘黨
曾蛇仔等七巢並興大肆毒痛遠近震恐公發諸路
兵夾勦賊大懼願撫且裝通判董鳴鳳以要公曰此
賊故智耳吾人常墮其計容復蹈乎乃下令曰通判
自偵事不足恤有能被之出者予弗死益督進兵力
戰賊大敗渠魁生禽俘馘千餘牛馬器械獲甚衆餘
黨奔竄於是犁其庭籍其田業貧民審其脅從者分
配內地通判卒獲全公制變決機奇中折衝辱俎之

聞而親臨戰陳者咸弗及也至上功獻捷初弗張皇
謂臣子効勞期於成事而已希賞非我志也故紀述
勞勛多歸之人其俘獲稍涉疑似卽不以報會據史
白故事宜納賂不者功雖高不賞公曰我寧無功耳
奏 上會召爲工部右侍郎迨論功竟弗及焉還朝
值河溢淤漕任事者興新河之役費且數十萬死者
數千人人心沟沟歲運不繼上憂之廷議必得公代
乃可賜璽書兼憲職往蒞事公還甫三月也旣受命
普殫慮畢力以濟大事夙夜思惟考故詢謀以沛漕
之淤塞因黃河之旁衝黃河之旁衝因上流之未疏

今宜疏支河以殺其勢築長隄以防其衝然後挑通
沛漕自無復淤之患乃上疏其略曰河流故道非一
其大而要者若孫家渡趙皮寨乃上流之支河沛縣
飛雲橋乃下流之支河弘治以前三支分流會于淮
而入海故徐沛不受其害邇來上流二支俱就湮塞
全河東下併歸飛雲橋一支下束徐呂二洪上遏閘
河流水溢爲遊波茫無畔岸於是決隄壅沙大爲漕
患今日之計因當挑濬舊漕以通糧運加築隄岸以
防衝決然非疏上流之支河將來秋水復發沙雖挑
而難保其不復淤隄雖築而難保其不復決探本之

論固有在矣

上嘉納焉至濟卽建觀徐沛淤消

新河險阻沿黃河出豐單以求決甯奔衝之迹洞悉利害而得其要機遂築長隄起單至沛凡百四十餘里時建議者欲別遣官相度意在阻公適有旨下公計處乃復上疏其略曰漕渠廟道口下忽淤數十里者由決河西來橫衝掣開河水入昭陽湖以致開水不復南流而飛雲橋之水時復北漫故沙停而淤也今宜加築東隄以遏入湖之路更築西隄以防黃河之衝俾其自北而南常由故道則沙不復淤矣臣愚且拙不敢求新奇之功不敢爲苟且之計惟欲因舊

以爲功從省以濟事順水性以除患故舍新河而修
舊漕者圖其易也沿黃河爲隄者防其溢也停槩派
夫十數萬僅用河夫二萬餘者恐民勞也罷顧募而
行犒助者慮繼費也 上復納之劉司空麟遺公書

言近日議者謂趙皮寨孫家渡不足洩黃河怒漕渠
或不免復淤柰何公復書云黃河爲中原患非一日
矣智者不與水爭地惟順其勢而導之後世或塞其
決或隄其卑或疏其派皆隨時救患者也國家漕渠
爲南北咽喉勢不得不與河爭地弘治初河決荊隆
口又決黃陵岡又決張秋當時嘗漕孫家渡宿遷小

河而後荆隆黃陵張秋可塞此分洩河怒之驗也況
自河南歷直隸至山東之曹縣恃長隄以禦河患亦
既有年今卑豐沛爲隄獨不可以捍禦乎蓋事理可
據與人力可爲者如是而已若欲別求遠圖則新河
之役可爲殷鑒公遂毅然行之役夫費銀不滿二萬
不期年而功成沛漕流通歲運如故每河漲隄下水
退沙迴民多耕作焉其後河徙成化間故道出徐州
小浮橋合運河而飛雲橋道塞無復沙淤之患矣已
丑秋境山河忽西徙三百步亂石絕河湍射下數仞
雖虛舟不得上有冒險而下者十覆三四遠近駭懼

舟戒弗行公命穿故河廣十步以通水稍截徙河逼
之東兩涯下埽以漸相屬及兩埽逼河流激盪乃決
入故河奔放衝滌一夕河廣一倍二三日盡復其舊
人謂禹之行水弗是過也是役也有風公終新河之
緒者有謂當條新河之害以聞者公一弗從蓋公之
忠不欲徇人之非以僨國之是而其厚不欲揚人之
短以彰已之功故功卒成而人弗病於是御史傅君
炯疏公費省而成速上紓 九重消河之憂下遣一
方民田之利工部尚書章公拯疏公區畫有方督理
有序國之峻功一旦告成宜加陞賞以勵臣工 上

乃詔加公尚書俸級仍總理之任然公積勞成疾自此始矣是年冬疏乞骸上溫旨慰留義不敢復辭辛卯春召改兵右侍郎五日而部署災時堂屬多被逮公以一身疲衆務收煨散之圖書防胥緣之奸弊罔有餘力又奏罷各省鎮守太監是年秋陞本部左侍郎冬復奉勅督理仁壽宮役力疾趨事壬辰三月十九日戊辰朝服侍上御殿傳制賜進士退朝同省集迎主賓百餘冠裳濟濟宴會盡歡比日晏歸復接賓客罷如臥內少休有頃則氣微微逝矣明日訃聞於朝咸驚愕以爲異旁皇赴弔天子軫哀特

贈兵部尚書賜葬祭

少司馬石崗蔡公天佑墓誌銘

賈詠

公諱天佑字成之別號石崗其先陽山人元季避兵徙睢陽遂占籍焉贈後軍都督府經歷加贈右副都御史敬之孫中憲大夫濟南守加贈右副都御史晟之子也母封太淑人胡氏實生公幼岐嶷聰敏過人濟南公愛之嘗置膝上教之以對輒能應每對客試之不爽咸目爲奇童長通易經補州庠弟子員弘治戊午舉于鄉乙丑舉進士選入翰林爲庶吉士得盡讀中秘書授吏科給事中憲諤自持封駁無所避忤權貴出爲閩臬僉事會江西盜起聞于朝以閩兵

協勛公往平之在閩多風力當董內府供應綾紗紙
盡革宿弊權豪斂迹省價數千緡部使薦之未幾轉
山東叅政尋改憲副守遼陽按部所至弊絕風清值
歲歉多方節縮活餓民萬餘又閩海道圩田數萬頃
民與其業名曰蔡公田濟南龍山有惡少哨聚爲亂
勢甚洶洶公分兵勦之擣其穴淄川盜起刼掠鄉邑
公捕獲其魁坐以法餘黨悉散再改陝右遷山西按
察使提點刑獄一道肅清居無何雲中五堡軍亂殺
撫臣事聞九重用朝薦特簡公往進右僉都御史
卽日就道至與武太監忠朱總兵振誓曰弭此變非

奮不顧身不可僉曰唯乃集亂軍諭以朝廷恩威衆始奮各欲自獻未果桂總兵永密率家衆誅亂者十餘人衆攻圍其家矢盡被執幾爲所害公冒白刃救之得解退而廉得元惡之尤者四人正諸法餘孽度不自容夜焚朱總兵宅公下令懸賞示之遂撲滅人心少定先是督餉主事至羣心自危復起亂上震怒命胡侍郎帥兵討之衆奔赴公前泣求救公示以早圖自獻誅可追衆皆響應獻元惡十餘人傳首以示脅從者宥之人心始帖然無復反側公遂上請班師詔下凱旋人益安上優詔答之進右副都

御史有彩幣白金之賜且諭之曰有臣如此紆朕北
顧之虞命大司馬舉賞功之典進兵部左侍郎召還
民感德爲生祠祀之扁曰安輯行日民爲罷市哭聲
震野且送且留者三百餘里已而爲權倖所忌以事
中之公不辨惟懇求退避疏三上乃俞公歸閉門以
詩酒自娛教授生徒課子力學而憂國之心未嘗少
忘誣亦自白再起公至中途以疾辭荷溫旨許暫回
調理明年公不起卒于石崗書屋之東軒

兵部右侍郎涂水寇公天叙墓誌銘 呂柟

公諱天叙字子惇姓寇氏別號涂水以其邑愉次之
南有涂水云公年二十二中弘治辛酉鄉試與予同
試禮部不第卒業大學乃會三原秦世觀馬伯循安
陽張仲修崔子鍾臨慮馬敬臣同憲學四年遂同予
舉正德戊辰進士筮仕南京大理寺評事卽清介自
持不濫交遊政少暇閉戶誦律讀書布袍蔬食猶如
書生時有一巨姓犯法不出官以家人代罪公駁之
曰某人在而不出稱逃非欺人卽欺天刑部奏請鞫
事衙門捕獲竟抵罪上下稱其才節及進左寺副教

履如前考績之年所審過輕重囚犯五千四百七十一起萬有八千二百五十一名口罔不克允故一時本寺及部院考署超邁等夷至形薦剡名聞天下丙子陞寧波知府一以愛民節財爲政其均徭清稅剔冗除害鋤強杜謁興利彰善咸殫心力嘗書青天白日高山大川愛民如子處事如家四語于座右丁丑歲稔乃請于巡按秋糧得折價民有挽回烏府蒞家春之誼慈谿有馮二虎者武斷鄉曲公置之于法合邑安堵形諸歌謠尤加意學校以體認實踐爲教取人必先器識于是四明之士多崇尚理學嘗與鄉試

外簾三試卷皆屬公總閱有知縣某者持一卷請覽
公曰此不宜取知縣固請則固止之開榜後拆所請
卷乃其所私者時同試者曰公神目也每遇早乾齋
心虔禱罔不響應上下歡欣寧波之民愛戴真如父
母一時言官疊稱薦書齊口褒嘉在郡三載政績卓
異治行可課天下第一已卯秋超陞應天府丞老稚
攀號跪請留鞅公固遜拒沿河兩岸挽舟不能行鄉
紳大夫歌詠其事謂此郡自張廣漢後惟公一人而
已比至應天寧濠倡亂武廟親征過止南京供億
叢挫府尹胡公感勞成疾獨公應答時內外權幸無

慮數百公處之有方莫敢肆侮且于安求冗費多所
停裁未嘗科取上江縣民初上未至權幸先選女樂
千百拘置一所以俟幸未及二日死者十數餘多菜
色公言于權幸曰如此輩以候駕恐反取罪耳權幸
懼問計則曰吾當記名于簿召彼親識或食店酒肆
領養用則取諸簿耳于是之一日之間活人千餘庚辰
正月 上親觀迎春公治具于郊外俯伏廊下笑幸
疾公倨傲讒劾遲慢或曰此人動直不可動始免江
彬之寵獨冠一時羣賀生辰率行四拜公獨長揖彬
甚銜之曰偵公私久無所得偵者竊曰提督將不利

于公可一往謝公正色曰死生有命豈人所爲命若
得禍謝豈能免後彬謂人曰寇公眞君子也于是他
嬖幸亦皆因此斂迹若有需索公必曰吾當見上親
奏遂止其多所停裁者皆此故也捷奏獲賞銀牌綵
幣駕回撫按謀欲重遺諸幸公終不從惟獨送至淮
安然亦不能有加也中外皆服公之才操大軍旣去
公一意民事興學均賦休息地方比壬午今 上改
元嘉靖公應詔查舉七事內關神帛堂匠十庫花園
進鮮船隻等項冗役冗費百年積蠹一旦裁剗上下
稱快甲申歲大饑人相食公竭力賑濟設粥以食流

民尋瘟疫又作給藥以救皆公日親巡視或繼以夜
有言疫氣盛行以沮公者率皆不聽竟亦無恙又嘗
奏折允運糧以蘇民困四事皆獲允行是年夏以迎
聖母効勞有白金紵絲表裏之賜公在應天三載
初值車駕駐臨九月後值荒歉二年公周旋致身不
避其艱士林倚重百姓依歸南都根本之地賴公爲
一大保障初公至應天適當癸未考察京職有言官
嘗爲公屬吏懷怨者劾公因緣鄉里權要驟陞京堂
都院題覆謂公久敦士行素重官評公亦累疏求退
上特慰留及應天政成撫按交章論薦至再至三

人望益歸嘉靖三年冬陞都察院右僉都御史巡撫
宣府 朝廷尋以鄖陽事重改公提督撫治鄖陽任
方兩月又以甘肅西接回夷北隣胡虜南通土番介
處其中孤懸萬里之外近且士卒叛逆人心未定事
勢危急非有經濟才者不可委托乃又改公巡撫甘
肅公至月餘回賊三百寇犯山丹公調度斬擒酋首
脫脫木兒及餘黨三十六級回賊退服不敢復肆乃
遂作士氣時簡練禁侵削杜移役實月糧廣儲蓄均
水利興屯田撫屬番比及數月人心感悅咸有圖志
肅州有造匿名帖欲謀作亂者乃奸人每當徵收也

田時輒造此言以乞緩征公乃會總兵親詣肅州下令有能告捕者賞百金數日有告者捕得一道士及數軍生按實置罪卽如約給賞告者因詢屯政之故除額外之科衆心大悅竟無他變先年土魯番大掠甘肅廟議閉關絕貢至是數遞番文求和通貢語猶悖慢公上議宜出師示威可保無事時總制王公欲遣帖劫其王速檀沉速兒公又議自我太宗設立哈密後爲土魯番侵奪先後經略大臣止爲此尺寸之地今雖爲彼占據其名猶爲我地若帖云卽將速檀拜牙送還哈密爲王如本人不聽爾選擇本類

有力量一人主理國事則使此虜自專廢置是棄其
地矣不可行因上陳七事皆獲俞允一嚴清解以實
軍伍二清備禦以固邊疆三廣屯種以實邊儲四添
京運以養遊兵五處料物以飭軍器六添火器以壯
軍威七留部官以督軍儲俱言北邊切務西域有貢
獅子犀牛西狗者前巡撫陳公及禮部該科請却不
聽公奏言 皇上卽位來不好珍禽奇獸近曾却御
馬監虎豹之採以爲無益今復用此豈 陛下有見
于虎豹而不見于獅子牛狗邪伏望却還以潛消遠
夷窺伺之意尤願日御經筵親賢士云公在甘肅二

年華夷帖服邊人惟恐公去巡按胡君體乾疏請宜
進秩以酬經略之勞久任以慰邊人之望丙戌進右
副都御史巡撫陝西內撫八府外餉三邊兵荒相仍
時事甚難公靜以養民義以訓兵嚴以馭吏明以祛
奸圖大體急先務以爲關輔之望丁亥北虜寇固原
公調度截殺斬首百有九顆蓋前此所無之功也
皇上賜勅獎勵賞大紅織金紵絲三表裏白金三十
兩陞俸一級戊子歲大饑公疏請蠲蠲租稅大發銀
鹽以行賑忠誠懇切上爲之感動勅下如議公晝夜
區畫選委賢能守巡綜理周悉關中之民賴以全活

故雖遭大凶地方無虞織造大監至陝供億甚繁則
因諫歎奏請停止 上命取回人心大悅謂公有回
天之力庚寅陞刑部右侍郎未任丁教菴先生憂服
闋大臣科道屢薦之癸巳八月起改兵部右侍郎朝
野屬望乃九月下旬遂感痰疾然猶在部理事十月
初大同軍叛力疾上疏言滅賊之策且求休退 上
不允去而下其議于有司時有言官繫獄問死刑者
一大臣欲具疏以救謀于公公曰祇成君之名耳不
能救彼也其人問故答曰須同諸法司請于當路者
使恩出于 上則可從之言官果得緩誅是月望日

上賜鮮藕于其第十一月二十六日終于官邸之
正寢距生成化庚子年五十有四歲位未能竟其所
學嗚呼痛哉病中縉紳訪候無虛日遇人輒論國家
大事及爲學之要亶亶忘倦不知其病也其未竟之
志可知矣計聞 上傷悼賜諭祭勅有司營葬事

兵部左侍郎鄭公岳傳

柯維騏

鄭岳字汝華號山齋南湖先生露之後先世自桃源徙蒲坂高祖以貲雄於鄉被訟戍甘州因之破家一再傳益落父朴菴徙入城僦居金橋岳七歲而孤賴母林兄囑食貧而撫教之岳踰弱冠登弘治癸丑進士授戶部主事考績賜恩遂移疾歸葬其父起補刑部主事錦衣千戶張福同監市囚福恃勢越坐岳奏論語涉中貴孝宗怒下詔獄堂官疏救以免轉員外郎時邊事孔棘侍郎許進督師大同貴近惡其剛方議代前副總兵趙杲僨事坐廢謀復起京軍屢

出無功又議再遣岳抗疏論列人咸稱允擢潮廣按察使事 宗藩侵民田奏勘不決岳竟歸之民施州夷民忿爭營殺衛帥以亂聞岳勦首事數人餘悉諭遣他若辨盜鑄土官印信及追獲縛賣客民男婦百餘人皆異政荆岳歲饑無備設法以賑全活甚衆常德守刑貨瀆濫捕其信任者寘之法守解印綬去南京十三道會薦天下方面官十七人岳與焉 武宗初擢廣西兵備副使征里松洞奏捷及撫諭土酋岑猛連受褒賜築足灘廣運昭平三堡屹爲府江巨鎮調廣東副使滯獄爲空治稱第一尋

宸濠結逆瑾復護衛諸司承順勢益熾岳至力振風
紀爲濠所忌連擢本省左右布政使宸濠橫奪民田
億萬計民設寨聚守濠諷總制以兵勦岳沮止李剛
使夢陽江御史萬實相訐奏下藩臬會勘岳欲平其
理而夢陽務求勝致其怒濠從而嗾之乃執岳察司
舊役門隸誣用公堂銀鍛詞送濠禁錮寧聞下鎮巡
勘報濠左右夾持成獄家人擒捕殆盡子泓未冠亦
被執人心憤惋不平科道暨撫臣交疏其枉於是遣
大理寺卿燕忠給事中黎奭覆勘濠收質事證妻子
有無異詞衆環泣曰王府費萬金陷公公必欲白我

軍無噍類卽公亦禍叵測岳乃自誣服坐罷濠反事敗內外臣工交章論薦起岳四川左布政使以母喪未終制不赴嘉靖初制滿陞都察院右副都御史巡撫江西至則民擁道聚觀手額相慶岳奏賑恤受兵郡縣定次討逆軍功及贈祀死事之臣皆報可甫三閱月擢大理寺卿輔臣以擁立世宗功議封伯岳遺書內閣所厚蔣冕勸其辭避林見素俊以司寇召至協衷守法一無所假勘事陝西正總兵官李隆罪蓋隆與都御史許銘不協而嫁其禍也道見北人不知水利乃相度還奏爲足國之計前後凡四上疏皆

切時政陞兵部右侍郎無何轉左侍郎大同兵變赦而復叛岳主議管軍官各報首惡姓名誅之事可立定乃密令總兵桂勇斬首惡數人主兵者奪其功與奏帶大璫弟姪御史王官輒爲覈實岳署部事駁行改正內侍崔文方用事其姪指揮崔昂欲躡陞裨將岳又執不用權倖由茲側目岳嘗議大禮忤旨奪俸及是羣小媒孽眷寢衰會寧夏總兵种勛行賄求調爲東廠捕追金幣勛嘗失事被岳劾禮帖獨無岳名言官風聞論之岳上疏自白因力乞休致世宗聽之歸歸凡十五年薦起者六竟格弗大用云

胡守中傳

守中字伯時河南寧陵人也貌偉秀才藝舉舉而動止亡賴人咸賤之三十登進士改庶吉士授刑部主事時翊國公勛負上寵勢張甚家蓄金寶及伎妾多守中心利之自詭善彭老御內術見勛勛絕愛幸之假父子稱因得入內多通其伎妾改監察御史按畿內涿富人楊謙坐事當守中夜致白金二千黃金器數具賂守中業受之矣跡稍稍聞緹騎鈎誚者日窺戶亡停履守中不自安乃匿太半而以聞上坐楊謙戍會上幸楚道所履守中飭屬邑治馳道壯麗吏俱

衣文繡衣豐進饌而守中獨前行傭伏上遙見器之
俾從扈還自楚守中乘駿夜輒馳百里置頓還侍如
常布政使徐乾按察使吳永祿遺守中五百金發於
上逮繫乾永祿削秩歸遂改守中春坊司直郎擢都
察院左僉都御史再進副都御史兼詹事丞會 上
怒翊國公下之獄將窮究奸狀而守中恐乃極論翊
國罪自解虜入寇議薊州北當虜南援蔽京師三輔
要害地也須重臣鎮之擢守中兵部右侍郎餘官俱
如故開府便生殺朝辭 上召入對撫曰好爲官効
力行大用也賜飛魚袍守中出卽鳴金鼓具軍容而

北從二子衣文繡雕弧前列恐喝郡守相蒲伏惴惴
迎謁不爲禮至鎮簿錄叅將而下家稍饒者悉以計
鈎取其貲不則拔髮文面反接徇軍中倉儲刻取贖
萬計先是舊植樹隘口制胡騎奔突久則合抱矣守
中下令聽斬伐凡五十餘萬悉貨之巡撫徐廷璋老
儒迂緩守中視蔑如也將一載召歸圖虜中出獵屏
獻上上不悅而給事中允賢因條列守中罪狀詔
捕送司寇論死又兩載始棄市時年僅四十

通議大夫兵部左侍郎贈兵部尚書諡莊敏

公諧墓誌銘

呂 本

公諱諧字世和南川其別號也系出靖節之後有爲
台守者因黃巢之亂遂家焉尋徙會稽郡城六世祖
宗賜又徙郡仕成生壽是爲公祖以公貴贈通議大
夫兵部左侍郎兼都察院右僉都御史祖母魯氏贈
淑人壽生公父慥先以公爲工科右給事中封如其
官後贈同松菊翁母章氏先封孺人後封太淑人公
生而英敏瓌特孩提時覽然不羣十五六聲名籍籍
起庠校弘治乙卯公年二十二督學胡公按試大奇

之備歷數郡雜諸士試卒無有踰公者遂以解元薦
之已而果然明年丙辰舉進上選翰林庶吉士授工
科給事中首疏乞懲大誑以存大體叅鎮守太監劉
雲董讓各以昧事誣奏撫按宜重加戒罰詔允之著
爲令繼請緝聖學以裨治道極言治亂存亡之故且
更請大學衍義一置經筵以備進講一置宮禁以備
退覽指物警事無慮數百言 上嘉納焉轉工科右
給事中丁父憂歸起復當 武廟初年閹宦擅權是
非顛倒公遇事敢言其尤大者戒遊逸一疏專斥巨
閹劉瑾丘聚魏彬馬永成輩導 上恣意狗馬馳射

釣獵樂浹旬弗止曰逸遊者迷心之鴆毒致亂之階
梯也明王深以爲戒而末世之主皆以此喪心失德
以取亂亡瑾等蒙蔽聰明迷亂國政此 陛下之罪
人乃反徇之而不覺耶宜數其誤國之罪治之以法
他如遠譏佞以一政令脩人事以弭災異停止不急
工作以杜奸謀停止賣鹽織造等疏皆切中時弊當
是時公直聲動天下而瑾等切齒銜公日夜思所以
中之矣久之無所得以他事誣公杖之爲民旋又指
與大學士劉公健謝公遷及知名士五十三人爲黨
人錮之憾猶未已也書姓名於座側以公嘗巡視十

庫駕言缺乏布疋械繫至京下詔獄令公曩所劾太
監某同錦衣衛官蔡某督視廷杖意必斃之矣公憤
慨受杖而蔡某頗救之得不死謫戍肅州公與喪就
道弔講及諸親厚者淚下公朗吟曰只在乾坤內何
須歎別離聞者壯之在肅與大司馬劉公大夏大司
寇潘公藩更相唱和若牧羊臺賦蘆鴈橫塘等篇托
物感興寓意忠厚有離騷九章之風瑾誅詔還家作
數椽於田間日奉母氏歡讀書課農十餘年間足跡
不入城市嘉靖改元 世宗皇帝采錄天下名人乃
起公復原官未至陞江西按察司僉事區處發運南

京水允省費鉅萬時豐城雷煥九者盜引爲窩法當死以寃走匿公曰第無恐果寃吾爲爾辯之煥九出公以雜諸隸中使羣盜認之不識明日復鞠之誠門者執跂而矚者入盜叩頭曰是實賄我建昌獄中使誣煥九煥九曰是同宗而有讐不意其爲此也立出煥九罪又同宗有二商自遠歸其一商過舊館止食竟不歸其家以先歸有謀訟之公推按館人不服見館所畜鵲鵲能言使持刀詰之鵲鵲言積灰處啓灰得屍事遂白咸以爲神公折獄平反類若此踰年轉河南按察司副使管理河道公立法沿河植柳固堤

傍植葭葦採取捲掃以當草束簪木葦麻則以水利
河道贓罪紙米俱准收折纖毫不取於民總理臺臣
奏請通行歲省費十餘萬人渡河每中流苦舟人窘
索登岸不識姓名無所訴公令舟刻鳥獸形有被害
者卽指形詣有司告今天下津渡多刻鳥獸自公始
及擢本藩叅政適太行賊陳卿爲亂山西河南二省
當會勦公默自定計師未進以奇兵搏之遂擒卿地
方底寧公又嘗部運入局之奸弊遂絕至今部運者
至如歸擢右布政使尋轉左踰月擢都察院右副都
御史提督前贛汀漳等處軍務兼理巡撫至則條陳

數事請行曰重守令專分守寬農民懲貪吏行之甚
月厥有成績十二處瓊州諸岡平乙未剿七山擒斬
賊首趙宗欽等十三級從賊二百五名顆生擒五十
七名口各賊倒戈山降願赴軍門聽調爲畫地安插
之七山平獨連州大帽揚旗等山諸賊據天險結石
棚懸滾木機毒矢兵至如雨下不可近公選銳卒二
百婦人服挾短兵背擊竹筒貯火藥且以爲號夜援
藤上揚旗焚廬舍草木大兵鼓噪山下聲震天地賊
驚潰相蹂躪二百人從中砮之遂盡破大帽巖塘等
諸寨殺僞無敵王文興隆僞都督總兵林宗福等有

名賊首三十三級擒斬千九百七十七名願降獲千
一十七名口投降新民三百八十三戶公總督四年
餘凡六出師皆大捷每發兵諸將受方略而行反其
成功也不爽毫髮誠所謂沈謀可以掩著蔡勝氣可
以奪鬼神矣百餘年來言平寇者未有若是之速而
獲功之多者也國有彝典卽封拜不爲過否亦得進
秩序廕乃僅僅酬以金幣而已人言當路者以公恃
功弗求疑於慢乃廢兩廣缺總督擢公少司馬兼督
秩往蒞之先是羣盜憑恃險阻聯絡州縣甚至僭號
署偽官不知有 朝廷矣數十年不能平公至召諸

所苦賊熟彼中狀者密訪之更遣幕下敢死士與俱
過入賊巢盡圖其險易虛實以歸公一覽賊在目中
曰不難也但念海賊飄忽無定須先剿之乃作灣尾
巨舟於番禺海濱計必來焚我新舟伏水兵以待賊
果至大破之溺海死者過半殺賊謀主陳邦瑞於波
羅廟餘散去許折桂窮乞降得丁壯千八百有奇分
遣之乃征平南破石馬仙臺花相等山寨擒斬雷公
招渠魁百三十六名顆生得四千五十一名口潯州
以寧時壬辰八月也於是親督兵悉力於東西山按
圖刻期四路分擊使不得相救盡破巢寨一百二十

五處擒斬趙林花等有名賊首八十三級斬獲從賊
七千五百有奇德慶陽春等寇悉平分屯設守而還
甲午剿瓊州黎斬黎佛二等一百四級降從賊一千
一百一十有奇撫處巢崗五論者以朝廷報功未稱
不知公盡職爲安豈望恩澤哉公以太淑人年高乞
歸養疏 上至再三不允竟聞訃抱痛以歸詔賜祭
葬如例庚子服闋起貳本兵日夕考求職方險要諸
將勇怯思欲振刷九邊之弊及會議朝事侃侃必竭
盡所見但以習尚浮靡大異弘治時每形慨歎人稱
爲古君子而頗不宜於時矣辛丑九廟灾陳乞致仕

詞甚懇遂得請公科第既深而德望彌重位不稱德
士論惜之歲丙午遘疾卒計聞詔遣官祭葬贈兵部
尚書隆慶元年有司上公行誼勲烈追謚莊敏

通議大夫兵部左侍郎贈都察院右都御史潘

公珍墓誌銘

韓邦奇

嘉靖戊申七月初五日公卒己酉大宗伯以祭葬請
上曰如制大冢宰以贈官請 上曰潘珍准贈都
察院右都御史時 朝廷方嚴卹典三品官兼得者
鮮以公名德祭葬贈官均錫云公姓潘氏諱珍字玉
卿世居婺源之桃溪是爲桃溪潘氏至祖勤才公配
張氏生坦公配張氏祖考皆以公貴贈通議大夫兵
部左侍郎二張皆贈淑人公生七歲就外傳勤勉敦
朴不類羣兒甫弱冠充縣學生戊午中式壬戌登進

士授浙江紹興府諸暨縣知縣政務循良不事苛矯
創建預備倉更拓養濟院新孔子廟程力計工民不
知勞以治行徵拜大理寺左評事陞左寺副考滿延
尉西臺政府咸以明敏允克署其實於是封父母陞
左寺正尋陞山東按察司僉事時劇寇劉六等流劫
東郡公分巡東兗整擲民兵護衛親藩賊猝至城
下攻東門不得入乃去大掠曲阜公奏白徙縣築城
而曲阜始寧明年更巡海右都司某多內援怙勢侵
削軍士怨苦公廉訪獲狀按治抵法一道肅然更巡
東兗再更遼東東寧陞本司副使巡察海道而遼東

撫按以公巡東寧稱也奏以副使仍巡東寧吏部報
曰有成命矣時沿海衛倉官攢滿待勘吏緣爲奸查
駁至四五年典衣鬻子有隕身者公爲立法不再勘
死者厚恤之會丁封公憂服闋起巡福建海道捕擒
劇寇三百餘有白金紵絲之賜括民間私造大船可
浮海者買給水寨禁弗得再造而奸源塞矣陞山東
按察使公凡三任山東施澤旣久人心信愛稱爲潘
青天云陞湖廣右布政使尋轉左時巨璫差修承天
皇陵供費甚侈公量司帑所蓄旣汰其三之二復
分派隣省及取九江料銀協濟而湖民之困以舒湖

賦王祿爲重近富之屬率賂脫顧派取遠貧下邑旣
劑量不平又多逋欠公隨地所宜而賦之民皆稱便
陞右副都御史巡撫遼東贊理軍務公築邊牆繕城
堡濬壕塹清屯田廣積蓄利器械內修犬備明年乞
休不許丁張淑人憂服闋改南京右副都御史提督
操江乃敎造蜈蚣船及八槳船皆迅速如飛追賊無
弗及者擒斬番賊徐勲等獲其番物輸之官尋陞南
京兵部右侍郎召入兵部改左適安南請討莫登庸
廷議遣將提兵問罪公抗疏言北虜陸梁邊烽屢警
宜備北虜以急不可懷之強寇安南遠裔又本陳氏

故土黎氏篡之今莫氏復篡之禍亂相仍夷方常事
宜先遣使諭以禍福如其款服則順而撫之未可遽
勤王師 廷議以成命旣下不宜撓阻罷公閑住後
師至南中一如公言而安南平於是南臺合章乞還
公官不報會遇 恩詔公獲致仕是後大臣撫按多
薦起公將大用而公卒矣

兵部左侍郎贈工部尚書角山詹公榮神道碑

銘

葉向高

余生以正史之役討論塞下事而潑嘆左司馬角山詹公之功也雲中癸巳之變卒殺其帥以與夷媾封疆之吏莫之誰何至以重兵環其城而不能勝岌岌乎無雲中矣卒之雲中所以全皆由詹公公亦由此嚮用歷官左司馬會大司馬闕肅皇帝意屬公而公適以病求去帝怒奪公官公歸未踰年遂沒守土之吏莫敢爲公請卹公有一子又病廢諸孫皆稚僅藁葬公于城南之大灣蓋更五十餘年而公之孫

廷爲南銀臺幕語余以家世余乃悉取公之勲業著
在國史者以授廷曰此而祖之烈也湮沒弗章惜
哉廷遷爲京兆乃上書具言其事天子下所司覈
皆如廷言乃詔復公官予祭葬加籩又贈公爲工
部尚書廷歸致天子命于公之墓而請余爲之碑
余嘆曰嗟夫國家之於勞臣久而不忘如此也可
以昭主恩焉可以觀公論焉可以勸臣勩焉其容
已于辭公諱榮字仁甫號角山其先爲吾閩尤溪人
洪武間有詹旺者始以戎籍隸山海衛旺生玉玉生
通卽公祖若父也皆以公貴贈右副都御史通娶于

繼楊贈封皆淑人楊以弘治庚申九月初一日舉公
公少卽英敏年十二補衛諸生屢試高等嘉靖四年
舉于鄉明年成進士授戶部廣東司主事權稅河西
監兌湖廣皆有廉幹聲晉山西司郎中督餉大同大
同帥李瑾者馭士嚴軍中不附屬虜窺塞下瑾令卒
浚濠四十里週虜騎刻日竣工衆譁攻殺瑾守臣以
聞詔遣邵永爲帥劉源清督師討之叛卒懼欲誅首
亂自贖源清不許趣攻之終不能下乃相與謀城可
灌也公曰雲中重鎮以數十叛卒隳其城非計且隳
人何罪而以爲僇乃與都指揮紀振遊擊戴濂鎮撫

王寧等歃血盟討賊而私察賊黨馬昇楊麟者有才
略可用也爲請貸其死畀三十金使自募士昇麟遂
計擒亂首黃鎮等九人斬之又捕斬許章等二十六
人縛獻王寶等二十八人內外警伏公乃開城門廷
諸制府大帥直指使者以次導從鼓吹入拊循城中
城中人皆歡呼動地曰徵詹公我曹皆魚肉矣自變
起至事平凡五閱月焚掠無算獨公所部錢穀儲胥
秋毫莫敢犯論功晉光祿寺少卿以艱歸除服補尚
書司卿晉南京太常寺少卿隨擢僉都御史巡撫甘
肅甘肅地與諸番犬牙時肆侵掠公宣布威德勦撫

兼施境內晏然魯迷貢使留甘州者九十餘人大帥
楊信驅以禦虜死者九人公劾信夷以好來而用之
鋒鏑傷向化心且示虜弱非計也 詔奪信官厚恤

死者檣車送歸國夷皆悅服大同巡撫趙錦與帥周
尚文不相能事多肘掣廷議公故于大同有功宜徙
公大同 詔從之虜以數萬騎入公與尚文禦之黑
山斬五十餘級殺其一酋論功晉右副都御史賜金
幣明年虜復犯中路鐵裹門鵠鵠峪且將深入公嚴
兵遏虜衝而遣游騎四出邀擊斬獲甚多虜遁去捷
聞賜金幣公又修邊牆一百三十餘里爲堡七里爲

墩臺一百五十四虜自是不敢窺大同 肅皇帝喜
甚璽書褒公賜金幣晉俸一級代宗充灼與其黨張
文博等謀爲亂使告虜若來吾爲內應又遣人焚諸
草場絕芻牧以困我師公偵獲之充灼等俱正法論
功晉兵部右侍郎巡撫如故當嘉靖時虜張甚其大
酋帳直雲中日蹂躪塞下人情皇皇而公爲撫翁公
萬達爲督尚文爲帥相與戮力戰守邊備大修虜入
輒創去最後屢數萬騎犯滴水崖裨將董賜江翰與
戰死之尚文遇虜曹家庄三戰三克所斬虜過當奉
其旗捷聞晉公俸一級隨 召入以右侍郎攝曹事

屬當防秋公條上十策皆施行隨轉左而公病矣其卒爲嘉靖三十年十二月十二日得年僅五十二余嘗聞雲中變起永嘉當國主用兵莫敢撓其議詹公以一曹郎從容籌畫弄叛卒于股掌之上不血刃而全一城微公吾不知其禍之所底止也而公卒建節其地抗方張之虜而奪其魄此其功不百世祀哉自公罷歸虜闌入震驚畿甸大司馬死西市史臣遂謂公能以智免是殆淺之乎窺公矣銘曰詹來自閩乃隸尺籍再世而昌勲施竹帛業業雲中爲國北門帥殘卒驕禍燬斯屯師環其郭五月不下萬衆震驚有

誅無赦挺而走險其蔓難圖惟公紆畫殲厥凶渠終
朝廓清萬室按堵開門納師前歌後舞鎮人德公匪
祝伊尸其後十年公來視師虜一窺邊大劔而窺再
犯再奔斬賊無算惟 帝念勞返公于朝將畀戎柄
以遏奸驕公言臣病不任羈縻 帝謂汝達於汝賜
玦公歸無幾遽返其真荒原寂莫行路酸辛 今皇
聖明靡幽弗燭綸綍輝皇夜臺朝旭豐碑突兀偉伐
是鐫司空所樹萬模無刊

焦太史編輯國朝獻徵錄卷之四十終